

**Tusassimut aningaasaqarnikkut pilersuisuinissamullu innarliinngitsumik sumiiffinni internetikkut attaveqaatiluffiusuni attaveqaatit allat atorsinnaalernissaat periarfissanngortissinnaanersoq pillugu apeqquteqaat aallaavigalugu oqallisissiatatut siunnersuut**

**(Inatsisartutmedlem Aqqalu C. Jerimiassen, Atassut)**

**Akissuteqaat**

(Ineqarnermut Attaveqaasersuutinullu Naalakkersuisoq)

**Siullermeerineq**

Atassummit Aqqalu C. Jerimiassenip apeqquteqaat aallaavigalugu oqallisissiamik matuminnga saqqummiussineranut, Naalakkersuisut sinnerlugit qutsavigaara.

Inuiaqatigiit digitaliserinngoraluttuinnarnerisigut, nalunaarasuartaatitigut attaveqaatit pitsaasut pisariaqartippagut. Nalunaarasuartaatitigut attaveqarneq nunamut tamarmut qulakkeerumallugu, inoqarfiit akornanni kiisalu avataanut, avataaniillu Tusass nalunaarasuartaatitigut attaveqartitsinermi kisermaassivoq.

Teknologip massakut ineriartornera patsisaalluni, kisermaassisitsinitsinni massakut sinaakkusersuinerput sulii pitsaanerpaanik periarfiissinersoq isumaliutigisariaqarparput. Qaammataasaq atorlugu attaveqaatinik neqerooruteqartartut qaammataasamit, atuisunut ataasiakkaanut toqqaannartumik internetseqartitsisinnaapput. Nunani allani qaammataasaq atorlugu attaveqaatinik neqerooruteqartartut kingusinnerusukkut amerlisinnaapput. Oqarasuaatit angallattakkat qaammataasaq aqutugalugu aamma attaveqarsinnaangajalerput.

Qaammataasaq atorlugu attaveqaatinik neqerooruteqartartut teknologiivi Tusass-ip attaveqaatiminut ilaalersinnaatikkumallugit, taamaalillunilu sumiiffinni qaammataasat atorlugit attaveqaatilinni atuisut pitsaanerumik attaveqaateqalersikkumallugit, pilersuinermilu isumannaassuseqartikkumallugit, Tusass-ip qaammataasaq atorlugu attaveqaatinik neqerooruteqartartut oqaloqatigai. Tamanna akuersissummik allannguinissamik kinguneqassanngilaq. Qaammataasaq atorlugu attaveqaatinik neqerooruteqartartut Tusass avaqqullugu attaveqaatinik atuisunut toqqaannartumik neqerooruteqarsinnaalissappata, tamanna inatsimmik allannguisitsisariaqassaaq.

Nassuiaat "Qaammataasat: Periarfissat navianartuusinnaasullu" 2024-mi novembarimi Inatsisartunut tunniuppara. Taanna tunngavigalugu eqqartuinermut matumunnga eqqumaffigineqartariaqartut sisamat tikkuarusuppakka:

1. Tusass-ip illoqarfinnut, nunaqarfinnullu nalunaarasuartaatitigut attaveqaatai internetsimut, oqarasuaatinullu atorineqartarput. Tamanna pillugu atuisut ilaat qaammataasaq atorlugu attaveqaatinik neqerooruteqartartumut nuussappata, Tusass malunnaatilimmik aningaasartuutikinnerulissanngilaq.
2. Akuersissut kisermaassinermik, pilersuisussaataitanermillu nassataqarpoq.
3. Qaammataasaq atorlugu nunani allani attaveqaatinik neqerooruteqartartut, Kalaallit Nunaannilu atuisut akornanni pilersuinerup isumannaatsuunissaanut, qarasaasiatigut isumannaallisaanermut, atuisullu pisinnaatitaaffeqarnissaanut piunasaqaasioruminaatsitsisinnaavugut.
4. Ammanerulersitsinerup kingunissai kissaatigisatsitut ilinngikkaluartut, ammanerulersitsineq tunuartikkuminaassinnaavoq.

Sumiiffinni qaammataasat atorlugit attaveqaatilinni, nunaqarfinnilu nalunaarasuartaatitigut attaveqarnerup pitsaanerunissaata qulakkeerneqarnissaaa pillugu, Naalakkersuisut ataavartumik Tusass-imik oqaloqateqarput.

Taamatut oqaaseqarlunga oqallilluarnissamik kissaassivunga.